

Zakon o izmjenama i dopunama Zakona o krivičnom postupku Brčko distrikta Bosne i Hercegovine

(Službeni glasnik Brčko distrikta Bosne i Hercegovine broj: 3/19)

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na 40. redovnoj sjednici održanoj 30. januara 2019. godine, usvaja

ZAKON O IZMJENAMA I DOPUNAMA ZAKONA O KRIVIČNOM POSTUPKU BRČKO DISTRIKTA BOSNE I HERCEGOVINE

Član 1

U Zakonu o krivičnom postupku Brčko distrikta Bosne i Hercegovine (Službeni glasnik Brčko distrikta Bosne i Hercegovine, br. 33/13 – prečišćeni tekst i br. 27/14), član 84 mijenja se i glasi:

„Član 84

(Pravo svjedoka da ne odgovara na pojedina pitanja)

- (1) Svjedok ima pravo da ne odgovara na pojedina pitanja kada je vjerovatno da će ga odgovor na ta pitanja izložiti krivičnom gonjenju.
- (2) Svjedok koji koristi pravo iz stava 1 ovog člana, odgovorit će na ta pitanja ako glavni tužilac pismeno izjavi da neće preduzeti krivično gonjenje svjedoka za radnje koje svjedok navede u svome iskazu. Primjerak pismene izjave glavnog tužioca uručit će se svjedoku.
- (3) Izjavu iz stava 2 ovog člana glavni tužilac može dati pod uslovom da je iskaz svjedoka od važnosti za sprečavanje, otkrivanje i dokazivanje težeg krivičnog djela druge osobe za koje je propisana kazna zatvora deset i više godina, kao i za krivična djela iz stava 4 ovog člana.
- (4) Izjavu iz stava 2 ovog člana glavni tužilac može dati u postupku koji se vodi zbog:

a) krivičnih djela protiv države (glava XV),

b) krivičnih djela protiv čovječnosti i vrijednosti zaštićenih međunarodnim pravom propisanih Krivičnim zakonom Bosne i Hercegovine,

c) krivičnih djela terorizma (glava XVIII),

d) krivičnih djela: Protivpravno lišenje slobode (član 176); Otmica (član 177); Spolni odnos s nemoćnim licem (201 stav 1); Spolni odnos zloupotrebom položaja (202.); Prinuda na spolni odnos (203), Spolni odnos s djetetom (204 stav 1); Bludne radnje (205 stav 2); Iskorištavanje djeteta ili maloljetnika radi pornografije (član 208); Pranje novca (član 265); Porezna utaja (član 267); Udruživanje radi počinjenja krivičnih djela (334); Organizovani kriminal (336); Primanje dara i drugih oblika koristi (član 374); Davanje poklona i drugih oblika koristi (član 375); Primanje nagrade ili drugog oblika koristi za trgovinu uticajem (član 376); Davanje nagrade ili drugog oblika koristi za trgovinu uticajem (član 376a); Zloupotreba položaja ili ovlaštenja (član 377); Nezakonito pogodovanje (377a); Pronevjera (član 378); Prevara u službi (član 379); Protivzakonito oslobođenje lica kome je oduzeta sloboda (član 385); Oštećenje računarskih podataka i programa (387) i Računarska sabotaza (392).

(5) U izjavi iz stava 2 ovog člana će se naznačiti da se ona odnosi samo na radnje svjedoka koje čine krivično djelo s propisanom manjom kaznom od kazne koja je propisana za krivično djelo u odnosu na koje se daje iskaz ili povodom kojeg se vodi postupak i da se ne može odnositi na krivična djela za koja je propisana kazna zatvora deset godina ili teža kazna.

(6) Sud će rješenjem utvrditi da li je izjava glavnog tužioca iz stava 2 ovog člana u skladu sa stavovima 3, 4 i 5 ovog člana i odrediti advokata za savjetnika svjedoku za vrijeme saslušanja.

(7) Nakon što Sud donese rješenje iz stava 6 ovog člana glavni tužilac će pozvati svjedoka da da svoj iskaz. Prije saslušanja svjedok će dati pismenu izjavu da će kao svjedok, u krivičnom postupku dati istinit iskaz i da neće prešutjeti ništa što mu je poznato o krivičnom djelu iz stavova 3 i 4 o kojem daje iskaz i njegovom počinioocu. Svjedok će se upozoriti da ako odbije svjedočenje da će biti krivično gonjen zbog krivičnog djela za koje je dobio imunitet.

(8) Nakon što svjedok da iskaz, Glavni tužilac će donijeti rješenje o imunitetu svjedoka za krivično djelo koje proizilazi iz iskaza svjedoka datog u skladu sa stavom 2 ovog člana. U rješenju će biti naveden činjenični opis i pravna kvalifikacija krivičnog djela za koja se neće preduzeti krivično gonjenje svjedoka.

(9) Ako svjedok, u toku krivičnog postupka, ne postupi u skladu s stavom 7 ovog člana, glavni tužilac će donijeti rješenje kojim se uskraćuje svjedoku davanje imuniteta za krivično djelo na koje se odnosio iskaz svjedoka iz stava 2 ovog člana. Tužilac će uskratiti imunitet i u slučaju da se radnje koje je svjedok naveo u svom iskazu odnose na krivična djela za koja se ne može dati imunitet u smislu stavova 3, 4 i 5 ovog člana. U tim slučajevima, iskaz svjedoka s odgovorima na pitanja iz stava 1 ovog člana izdvojiti će se iz spisa predmeta i čuvati odvojeno, te se ne može koristiti u krivičnom postupku protiv svjedoka.

(10) U slučaju da glavni tužilac ne donese rješenje iz stava 8 ovog člana iskaz svjedoka sa odgovorima na pitanja iz stava 1 ovog člana izdvojit će se iz spisa predmeta i čuvati odvojeno, te se ne može koristiti u krivičnom postupku protiv svjedoka.

(11) Protiv svjedoka iz stava 2 ovog člana može se preduzeti krivično gonjenje za krivično djelo davanja lažnog iskaza.

(12) Imovinskopravni zahtjev oštećenog iz krivičnog djela za koje je svjedok dobio imunitet, pada na teret budžetskih sredstava.

Član 2

Član 117 mijenja se i glasi:

„Član 117

(Krivična djela za koja se mogu odrediti posebne istražne radnje)

Istražne radnje iz člana 116 stava 2 ovog zakona mogu se odrediti za krivična djela:

a) protiv države (glava XV),

b) terorizma (glava XVIII),

c) Otmica (član 177); Iskorištavanje djeteta ili maloljetnika radi pornografije (član 208); Neovlaštena proizvodnja i stavljanje u promet opojnih droga (član 232); Pranje novca (član 265); Udruživanje radi počinjenja krivičnih djela (334); Organizovani kriminal (336); Primanje dara i drugih oblika koristi (član 374); Davanje poklona i drugih oblika koristi (član 375); Primanje nagrade ili drugog oblika koristi za trgovinu uticajem (član 376); Davanje nagrade ili drugog oblika koristi za trgovinu uticajem (član 376a); Zloupotreba položaja ili ovlaštenja (član 377); Nezakonito pogodovanje (377a); Oštećenje računarskih podataka i programa (387); Računarska prevara (389) i Računarska sabotaza (392),

d) krivična djela za koje je propisana kazna zatvora najmanje pet godina ili teža kazna.

Član 3

U članu 118 stav 3 mijenja se i glasi:

„(3) Istražne radnje iz člana 116 stava 2 tačke od a) do d) i tačka g) ovog zakona, mogu trajati do mjesec dana, a ako one daju rezultate i postoji razlog da se nastavi sa njihovim provođenjem radi prikupljanja dokaza, mogu se na obrazložen prijedlog tužioca produžiti za još mjesec dana, s tim da mjere iz tačaka od a) do c) mogu trajati ukupno najduže šest mjeseci za krivična djela za koja se može izreći kazna zatvora najmanje pet godina ili teža kazna, a za ostala krivična djela najduže četiri mjeseca. Mjere iz tačaka d) i g) mogu trajati ukupno najduže tri mjeseca za krivična djela za koja se može izreći kazna zatvora najmanje pet godina ili teža kazna, a za ostala krivična djela najduže dva mjeseca. Izuzetno, u odnosu na krivično djelo organizovanog kriminala i krivična djela terorizma, istražne radnje iz člana 116 stava 2 tačke od a) do d) i tačka g) ovog zakona, ako one daju rezultate i postoji razlog da se nastavi sa njihovim provođenjem radi prikupljanja dokaza, mogu se na obrazložen prijedlog tužioca produžiti još tri mjeseca. Prijedlog za radnju iz člana 116 stava 2 tačka f) ovog zakona se može odnositi samo na jednokratni akt, a zahtjev za svaku narednu radnju protiv iste osobe mora sadržavati razloge koji opravdavaju njenu upotrebu. Primjena radnje iz člana 116 stava 2 tačka e) ovog zakona traje koliko je potrebno da se prikupe dokazi, a najduže godinu dana za krivična djela za koja se može izreći kazna zatvora najmanje pet godina, a za ostala krivična djela šest mjeseci.“

Član 4

Član 225 mijenja se i glasi:

„Član 225 (Okončanje istrage)

- (1) Tužilac okončava istragu kad nađe da je stanje stvari dovoljno razjašnjeno da se može podići optužnica ili obustaviti istraga. Okončanje istrage će se zabilježiti u spisu.
- (2) Ako se istraga ne završi u roku od šest mjeseci od donošenja naredbe o sprovođenju istrage, tužilac će obavijestiti Glavnog tužioca o razlozima neokončanja istrage. Glavni tužilac će odmah, a najkasnije u roku od 30 dana, odrediti novi rok za okončanje istrage koji ne može biti duži od šest mjeseci, odnosno koji ne može biti duži od jedne godine za krivična djela za koja se može izreći kazna zatvora u trajanju od 10 godina ili teža kazna, te naložiti preduzimanje potrebnih mjera da bi se istraga okončala.
- (3) Ukoliko istragu nije bilo moguće završiti u roku iz stava 2 ovog člana, tužilac će o razlozima zbog kojih istraga nije završena, u roku od osam dana obavijestiti glavnog tužioca.
- (4) Ukoliko istraga nije okončana u rokovima propisanim stavom 2 ovog člana, osumnjičeni, ukoliko je ispitan i oštećeni, mogu podnijeti pritužbu uredu Glavnog tužioca zbog dužine trajanja istrage. Ukoliko glavni tužilac utvrdi da je pritužba osnovana, preduzet će potrebne mjere i

odmah, a najkasnije u roku od 30 dana, odrediti novi rok koji ne može biti duži od šest mjeseci u kojem se istraga mora okončati, o čemu će obavijestiti podnosioca pritužbe.

(5) Optužnica se ne može podići ako osumnjičeni nije bio ispitan.“

Član 5

Član 226 mijenja se i glasi:

„Član 226 (Podizanje optužnice)

(1) Kad u toku istrage tužilac nađe da postoji dovoljno dokaza iz kojih proizlazi osnovana sumnja da je osumnjičeni učinio krivično djelo, pripremit će i uputiti optužnicu sudiji za prethodno saslušanje u roku od 30 dana od dana kada je okončanje istrage zabilježeno u spisu.

(2) Ukoliko tužilac ne uputi optužnicu u roku iz stava 1 ovog člana, dužan je u roku od osam dana, o razlozima zbog koji optužnica nije podignuta, obavijestiti glavnog tužioca koji će preduzeti mjere da tužilac, u roku koji ne može biti duži od 30 dana, podigne optužnicu.

(3) Ako tužilac u roku iz stava 2 ovog člana ne podigne optužnicu obavijestit će o tome Glavnog tužioca, osumnjičenog i oštećenog. Osumnjičeni i oštećeni imaju pravo u roku od osam dana od prijema obavijesti podnijeti pritužbu glavnom tužiocu. Ukoliko glavni tužilac utvrdi da je pritužba osnovana, preduzet će potrebne mjere i odrediti novi rok koji ne može biti duži od 15 dana za podizanje optužnice, o čemu će obavijestiti podnosioca pritužbe. Ako tužilac i nakon obavezujućeg uputstva glavnog tužioca ne podigne optužnicu, smatrat će se da je tužilac odustao od krivičnog gonjenja i o tome je dužan, u roku od 15 dana obavijestiti glavnog tužioca, osumnjičenog i oštećenog.

(4) Nakon podizanja optužnice, osumnjičeni, odnosno optuženi i branilac, imaju pravo uvida u sve spise i dokaze.

(5) Nakon podizanja optužnice, stranke ili branilac mogu predlagati sudiji za prethodno saslušanje preduzimanje radnji u skladu s članom 223 ovog zakona.“

Član 6

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-526/19

Brčko, 30. 1. 2019. godine

PREDSJEDNIK

SKUPŠTINE BRČKO DISTRIKTA BiH

Esed Kadrić